

Ardanzak Hazienda Saila berrantolatu du PSE-EE horren aurka egon arren

EEtik etorritako sailburuorde eta zuzendariak kargutik kendu ditu

Jose Antonio Ardanza lehendakariak gobernu krisiari amaiera eman nahi izan zion atzo Hazienda Sailaren berregituraketa onartuz. PSE-EE, aldiz, ez dago erabakiarekin konforme, eta krisiak bere horretan segitzen duelakoan dago. Gaur krisiari buruzko xehetasunak eskainiko dituzte sozialistek.

FELIX IRIARTE / GASTEIZ

Lehendakariak Ogasun Saila berregituratu zuen atzo. Jon Larrinagaren dimisioak Ekonomia Sailaren desagerpena ekarri zuen otsailaren 23an, eta saila bitan banatu zuen Ardanzak: Ekonomia eta Eustat erakundea Ogasun Sailera igaro zituen eta Ingurugiroa Hirigintzara. Behin-behineko erabaki hori behin-betikoa bihurtu zuen atzo Ardanzak, PSE-EE kontra agertu bazen ere.

Aurrerantzean Ekonomia eta Ogasun Saila izango da izen berria, eta hiru sailordetza eta zortzi zuzendaritza izango ditu. Behin-behinekotasunean egon den bitartean, bost sailordetza eta 11 zuzendaritza izan ditu.

Berrantolaketa onorioa EEtik etorritako sailburuorde eta zuzendariak kargutik kentzea izan da. Juan Castrok Ekonomia sailordetza utzi egin du, Juan Carlos Landetak Plangintza sailordetza, Alberto Alberdik Ikerketa eta Metodo zuzendaritza, Juan Antonio Kruzelegik Kointura zuzendaritza, Koldo Hualdek Plangintza zuzendaritza eta Mikel Agirrek Zerbitzu zuzen-



Ardanzak ez du onartu Larrinagaren dimisioaren ostean PSEk egindako proposamenik.

A. GILLENEA

daritza. Hauen orde, Ardanzak Fernando Olmos izendatu du Ekonomia eta Aurrekontu sailburuordetzarako eta Pedro Azpiazu Ekonomia eta Plangintza zuzendaritzarako. Eustat erakundeak ez du aldaketarik izango.

SOZIALISTEN AURKAKO BOTOA

PSE-EEko lau sailburuek Ardanzak aurkezturiko dekretuaren aurka bozkatu zuten Gobernu Kontseiluan. Joseba Arregi bozeramaileak esan zuen sozialisten haserrea dekretuaren atzean dagoenak eragin

duela, hots, Jaurilaritzan zegoen jeltzale eta sozialisten arteko oreka hautsi izanak.

Jaurilaritzako krisi honek —Arregik ez du uste hainbeste-rainokoa denik, eta krisia hitza berak ez duela inoiz erabili nabarmendu zuen— ez du Gobernu Ituna hautsiko. Ildo horretan egindako galderari Arregik isiltasunez erantzun zion, eta gero hitzak soberan zeudela esan zuen, Gobernu koalizioa hausteko aukerarik ez dagoela argi eta garbi adieraziz. PSE-EEko iturriek gauza bera adierazi dute, baina haserrea norainokoa den

eta aurrerantzean zer jokabide izango duten gaur argituko dute Ramon Jauregik eta Jon Larrinagak.

Carlos Garaikoetxea EAKo lehendakariak, aldiz, krisia badagoela uste du. Atzo adierazi zuenez, berak ez du inoiz antzerako gauzarik ikusi «munduko inongo gobernutan». «Hemen edozer gauza ikustera ohituta gaude, baina mundu osoan ez da egongo halako gobernurik, non bata besteari sekulakoak esaten dizkion eta lehendakaria egoera hain penagarrian dagoen», adierazi zuen Garaikoetxeak.

Herrialdeka egingo ditu PSE-EEk bategite kongresuak

GASTEIZ

PSE-EE alderdiak datorren asteburuan amaituko du bere bategite prozesua. Euskal Autonomi Elkarteko hiru herrialdeetan egingo dituzte orain PSE-PSOE eta EEren arteko bategite kongresuak. Araba eta Gipuzkoan larunbatean egingo dute, eta Bizkaian igandean.

Gipuzkoari dagokionez, PSE eta EEk erdibana banatuko dituzte alderdi berriaren zuzendaritza organoak. Larunbateko I. Kongresuan hautatuko den Gipuzkoako PSE-EEren batzar probintziala alderdi sozialistatik datozen 20 kidek eta Euskadiko Ezker-rako beste horrenbestek osatuko dute. Batzorde eragile eta iraunkorreko osaketa ere antzekoa izango da, bi alderdietako buruzagiek orain dela gutxi ezagutzera eman zuten. EEko kideek Kultura, Gaztedia eta Harreman Instituzionalak sailak har ditzakete, eta Xabier Mai-za EEko kideak hartuko du beharbada azken ardura hori. Jesus Egigurenek jarraituko du Gipuzkoako idazkaritza nagusian.

Gipuzkoako Kongresuan 175 ordezkari hartuko dute parte, 125 PSEtik joanak eta 50 EEtik. PSEk 2.600 afiliatu ditu herrialde honetan eta EEko beste 400 sartzea espero dute. Araban 832 afiliatu joango dira PSEtik alderdi berrira eta 198 EEtik. Kongresura 62 joango dira lehenengotik eta 20 bigarrenetik.

Goikoetxea sarjentuak Ertzaintza utzi egin behar du Auzitegiak ebatzi duenez

BILBO

Jose Antonio Goikoetxea Asla sarjentu nagusiak Ertzaintza utzi egin behar du, EAEko Auzitegi Nagusiak ebatzi duenez. Goikoetxea Asla legez kanpoko entzuketak egiteagatik kondenatuta dago eta horregatik ertzain izateko inhabilitatu behar dela azaldu du Auzitegiak bere ebazpenean.

Eusko Jaurilaritzako Barne Sailak epaia nola bete behar zen argitzea eskatu zion Auzitegi Nagusiari eta atzoko ebazpena Barne Sailaren galderari emandako erantzuna da.

Carlos Garaikoetxea Eusko Alkartasunako lehendakariari

egin zizkieten entzuketak zirela eta kondenatu zuten Jose Antonio Goikoetxea Asla 1991ko apirilko epaian, eta «delituaren unean betetzen zuen kargu publikorako» sei urte eta egun batego inhabilitazio berezira zigortu zuten.

Juan Maria Atutxa Barne kontseilariak AVCS unitateko buruzagitzatik kendu zuen baina ez zuen inhabilitatu ertzain gisa, kargutik kentzean epaia betetzen ari zela uste baitzuen.

Hala ere, Auzitegiari epaia nola bete behar zuen argitzea eskatu zion.

Carlos Garaikoetxearen legezko ordezkaria eta fiskala Barne Saila egiten ari zen interpre-

tazioaren kontra azaldu ziren.

Auzitegi Nagusiak honela azaldu du bere erabakia: Goikoetxearen inhabilitazioa «polizi funtzionari edo Ertzaintzako kide izaerari dagokio». Polizi funtzionari izaerari lotu zitzaion delitua, Auzitegiaren ebazpenaren arabera, eta horregatik ez dauka garrantzirik kondenatuaren kargua Ertzaintzaren egituraren baitan.

Auzipetuaren portaera neurtzeko, ezarri zaion tipo penala kontuan hartuz, «polizi izaera da bakarrik aintzakotzat hartzen dena», Auzitegiak azaldu duenez. EAEko Justizia Auzitegi Nagusiak bertan behara utzi ditu Barne Sailaren argudioak.



DONOSTIAKO ZUZENBIDE FAKULTATEA
MASTER ETA POSTGRADU IKASTAROA K

MASTER Y CURSOS DE POSTGRADO
FACULTAD DE DERECHO DE SAN SEBASTIAN

eman ta zabal zazu



INGURUKO-ZUZENBIDEAREN DIPLOMA 92 / 93 IKASTAROA

Gaia: "PROBLEMAS ACTUALES DEL FEDERALISMO AMERICANO"

Eguna: 1993ko martxoaren 31n

Lekua: Gradu Aretoa

Ordua: 16.00 o. - 18.30 o.

Hizlaria: JAMES HUFFMAN Jr.,
Lewis and Clark Law School,
Zuzenbide Konstituzionaleko
Irakaslea

(Sarrera irekia)